

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИ
ДАВЛАТ ТЕСТ МАРКАЗИ

ПРЕСС-РЕЛИЗ

“ОЛИЙ ТАЪЛИМ МУАССАСАЛАРИГА ТЕСТ СИНОВЛАРИ ОРҚАЛИ ҚАБУЛ ҚИЛИШ
ТИЗИМИНИ ТАКОМИЛЛАШТИРИШ БЎЙИЧА ҚЎШИМЧА ЧОРА-ТАДБИРЛАР
ТЎҒРИСИДА”ГИ ҚАРОР ЛОЙИХАСИ БЎЙИЧА ШАРҲ

ТОШКЕНТ-2019

2019 йилнинг 15 февраль куни “Олий таълим муассасаларига тест синовлари орқали қабул қилиш тизимини такомиллаштириш бўйича қўшимча чора-тадбирлар тўғрисида”ги қарор лойиҳаси жамоатчилик мұхокамасига тақдим этиш учун regulation.gov.uz.ga жойлаштирилди. Шу муносабат билан ва оммавий ахборот воситалари вакилларини ҳамда оммавий ахборот воситалари орқали кенг жамоатчиликка қарор лойиҳасининг мазмун-моҳияти билан яқиндан таништириш, оммавий электрон ахборот воситаларида билдирилаётган фикр ва таклифларга муносабат билдириш мақсадида 2019 йилнинг 23 февралда Ахборот ва оммавий коммуникациялар агентлигига матбуот анжумани бўлиб ўтди.

Мамлакатимизда ҳам таълим соҳаси ривожланган сари ёшларимизнинг олий маълумотли касб эгаси бўлиш истаги тобора ошиб бормоқда. Шулар ва хорижий давлатларнинг таълим соҳаси тажрибасини ўрганиш натижалари ёшларимизга янада кенг имкониятлар яратиш эҳтиёжини келтириб чиқармокда. Шуларни инобатга олиб, ушбу қарор лойиҳаси ишлаб чиқилди. Унга Президентимизнинг Олий Мажлис депутатларига қилган Мурожаатномаларида қайд этилган ва “2017 – 2021 йилларда Ўзбекистон Республикасини ривожлантиришнинг бешта устувор йўналиши бўйича ҳаракатлар стратегиясини «Фаол инвестициялар ва ижтимоий ривожланиш йили»да амалга оширишга оид Давлат дастурида ўз аксини топган ўзгаришлар доирасида ишлаб чиқилган таклифлар киритилди. Қарор лойиҳасида қўйидагилар назарда тутилмоқда:

Мамлакат раҳбарининг ташабbusлари билан 2018 йилда олий таълим муассасаларига ўқишга кириш учун тест синовлари янги талаблар асосида адолатли, шаффоф, холис ва очик тартибда ўтказилди. Ушбу ўзгаришлар абитуриентлар, уларнинг ота-оналари ва кенг жамоатчилик томонидан яхши қабул қилинди.

2019/2020 ўқув йили қабулида ҳам 2018 йилдаги тажрибани давом эттирган ҳолда тест синовлари жараёнида ёшлар учун қўшимча имкониятлар ва қулайликлар яратиш мақсадида қарор лойиҳасида таклифлар тақдим этилмоқда.

Биринчидан, абитуриентлар ва уларнинг ота-оналари томонидан ортиқча оворагарчиликлар ва ҳаражатларни олдини олиш мақсадида уларнинг яшаб турган манзилида Давлат хизматлари марказлари орқали рўйхатга олиш, абитуриент томонидан танланаштирилган таълим муассасасининг жойлашган худудидан қатъи назар, **ўзи яшаб турган худудда тест синовларида иштирок этиши** қарор лойиҳасига киритилди.

Иккинчидан, абитуриентларнинг ўқишга кириш имкониятини янада ошириш мақсадида уларга бир вақтнинг ўзида учта бакалавриат таълим йўналишини танлаш ҳуқуқи берилмоқда.

Абитуриентларга янада кенг имконият – уларга амал қилиш муддати уч йил бўлган сертификат берилади. Сертификатдан улар уч йил давомида олий таълим муассасаларига ўқишга кириш учун фойдаланиш мумкин бўлади.

Учинчидан, жорий йилда мактаб, лицей ва коллежларни яқунлаган битурувчилар учун тест синовлари мутлақо бепул, ҳеч қандай тўловларсиз ўтказилиш тартиби сақланиб қолинмоқда. Шу билан бирга, ўтган йил ва ундан олдинги даврда ўқишини тугатган абитуриентлар тест синовларида иштирок этиши учун энг кам иш ҳақининг бир баробари миқдорида тўловни амалга ошириш тартиби таклиф қилинмоқда.

Абитуриентлардан тушган **тўловлар** тест синовларини янада **сифатли ва қулай шароитларда ташкил этиш** билан боғлиқ ҳаражатларни молиявий таъминлашга йўналтирилиши режалаштирилган. Ушбу маблағлар биноларнинг ижара тўловига, катта қувватли кондиционерлар, шахсни аниқлаш ва кузатиш камераси, ота-оналар учун мониторлар билан жиҳозлашга ҳамда абитуриентларни ичимлик суви ва ручка билан таъминлашга **йўналтирилади**.

Шу билан бирга, тест синовларини ташкил этиш жуда катта қўшимча молиявий маблағларни талаб этади ва абитуриентлардан тушадиган тўловлар мавжуд ҳаражатларни тўлиқ қоплаш учун етарли деб бўлмайди. Улар жумласига, тўрт мингдан ортиқ гурӯҳ назоратчиларига тўланадиган иш ҳақи, уларга ташкил этиладиган тушлик, тест материалларини сифатли тайёрлаш, ўз вақтида белгиланган жойларга етказиб бериш, олиб келиш, сақлаш ва шу кабилар киради.

Тест синовларига тўловни жорий этиш таклифи амалда тайёргарликсиз келаётган, билимсиз ва ғаразли мақсад билан иштирок этаётган абитуриентлар сонининг ва тест синовлари жараёнида ўзгадан ёрдам олиш ёки ёрдам бериш ҳолатларининг камайишига олиб келади. Ушбу ҳолат хорижий мамлакатларда кенг тарқалган бўлиб, олий таълим муассасалари томонидан ўтказиладиган тест синовларида жорий этилган.